

摘藻堂四庫全書薈要

史部

欽定四庫全書薈要

史部

殊批諭旨卷二百十七之二

詳校官編修臣繆晉

欽定四庫全書薈要卷八千二百十六

史部

硃批諭旨卷二百十七之二

硃批石麟奏摺

雍正六年正月初四日山西巡撫臣石麟謹

奏為遵

旨據實奏

聞事竊臣前議奏晉省各案虧空一摺奉有

硃批臣跪讀之下仰見我

皇上至聖至明無微不燭臣查高成齡陞任布政使歷  
今四載有餘凡於錢糧事務俱伊經手不無瞻徇  
之弊且今又擬有著落賠補虧空之項若仍令在  
任恐致掩飾牽混以臣愚見自宜令其離任則一  
切錢糧易得清楚除酌議追補虧空之案開印具  
題外臣謹據實具摺奏

聞謹

奏

令其離任固是但一時未得勝任之人且爾到任未久  
諸凡尚須協助稍遲數時候朕有旨此其間爾宜更加  
審度如查無通同欺瞞情弊為人尚屬和平有守熟練  
地方有可惜處據實再奏以聞

雍正六年正月二十二日山西巡撫臣石麟謹  
奏為請

旨事竊臣前奏殺虎口應否設立關門之處擬於正月  
初間臣親往確勘一摺奉有

硃批臣隨於本年正月初四日起程前往於初九日到  
彼逐一查看得殺虎口外係蒙古地方前朝建築  
邊牆設有馬市樓一座下設閘門四層門洞低狹  
只可單身行旅徒步出入自我

朝定鼎中外一統口外歸化城即為貿易之所商民往  
來交易日盛順治八年遂設監督一員於此經收  
稅課閘門之西有大河一道按之誌書詢之土人  
前明萬曆年間於河上接連邊牆建立萬全橋一

座計十九洞又於閘門之西萬全橋之東中間建  
立大樓一座後於康熙五年因暴雨水漲將萬全  
橋東邊六洞半并大樓一座連邊牆共衝倒六十  
餘丈橋下前後遂致沙泥淤塞水不歸橋下而移  
向衝決之河口流出口外至康熙三十三年間因  
設右衛將軍建造營房出口砍大青山木植以閘  
門狹小難以拉運車輛遂於倒缺之處闢立木柵  
欄以通往來因而貨物駝馬牛羊亦從此出入商

旅稱便監督亦隨於此立一收稅所徵收稅銀而  
河口亦設木柵以為遮攔撥有滿洲同綠旗官兵  
於閘門木柵攔關口及河口東西兩岸查看出口  
禁物相沿已久今原任監督臣三保條奏殺虎口  
應照張家口等處之例於現今收稅木柵攔關口  
設立閘門等因臣查自設立木柵攔關口以來業  
經多年商旅雲集於此外藩蒙古往來進

貢絡繹不絕若於木柵攔關口設立閘門查關口之

去河口僅十餘丈勢必於河口築隄保護將萬全  
橋下前後淤泥挖去使水仍歸橋下并補修橋洞  
邊牆而後方可垂久若不修河口并萬全橋洞邊  
牆則未能接連雖設關門亦不能如張家口等處  
關門之壯麗也且挖驗河口之土深至五尺俱係  
沙礫即使補修橋洞邊牆設立關門無論錢糧浩  
繁而一經暴雨沙礫之土鬆泛易於侵削難以保  
固是徒費錢糧未有裨益以臣愚見莫若仍照舊

制嚴飭滿洲綠旗官兵加謹看守毋庸更設關門之為便也臣又查看得關門之去木柵欄僅十餘丈之地一切貨物自應俱從木柵關口輸稅出入今查肩馱背負輕小之貨又有從關門出入者雖監督亦遣人於此稽查恐不能無賣放隱漏之弊且一處關口設立兩門亦屬未便似宜將此關門竟行封閉使大小輕重貨物俱由木柵欄關口輸稅以歸畫一但臣愚昧識淺所議未知當否謹將

看過情由先行具摺奏

聞伏乞

皇上睿鑒指示遵行謹

奏

覽所奏情形原委甚屬詳悉但此事全憑爾斟酌定議  
朕未親歷其地不便指示是與否也

同日又

奏為奏

聞事雍正五年十二月十九日接到大學士朱軾等來  
字內開雍正五年十二月初二日吏部將原任大  
同通判王璵帶領引

見奉

旨王璵著補授廣西養利州知州欽此又奉

諭旨王璵家屬在晉爾等寫字與山西巡撫布按令其

酌量差員將伊家口送往粵西欽此字寄到臣臣隨

查明王璵在晉家屬酌量自晉至粵應需盤費臣

給銀四百兩布按二司各給銀二百兩共銀八百兩內交給王璵家屬銀七百兩又差臣標把總劉成文護送給發往回盤費銀一百兩已於雍正六年正月十一日自晉起程赴粵訖為此具摺奏

聞謹

奏

所奏知道了

前因藩司缺未得相宜之人故於爾摺內有暫留高成

齡之批諭今已得人另有旨諭部矣知之

雍正六年二月初二日山西巡撫臣石麟謹

奏為請

旨事竊臣查得晉省民間完納錢糧整戥完納者少或數錢或數分零星上納者多州縣拆封以數十戥之秤收而併作百兩一平之彈兌其中不無多餘謂之併頭此原非額外加耗亦非重戥秤收所致乃零收總兌自然而有之贏餘也臣隨行查各府

州去後今據覆稱各屬徵收錢糧每百兩除原定  
火耗之外尚有餘出併頭銀二兩等因臣查晉省  
每年額徵錢糧共二百八十二萬餘兩每百以二  
兩計算一歲共應有併頭銀五萬六千餘兩伏思  
州縣各官已蒙

皇恩賞給養廉起解錢糧又另給有傾銷腳價等費則  
併頭銀兩自不應仍歸州縣請將此項亦令州縣  
按數同耗羨一併解交司庫嗣後遇有解京餉之

飯食補平等費即於併頭銀內動支其餘存貯司庫以備地方之公用如蒙

俞允即以雍正六年為始開徵後飭令各州縣照數起解倘州縣因此項解交而有加耗者臣不時稽察嚴參應否如是理合繕摺具

奏伏乞

皇上睿鑒施行謹

奏

此項不應令州縣解交司庫仍少留餘步為是若耗羨之外又收贏餘倘不肖有司從而加耗則民力其何以堪耶

同日又

奏為遵

旨密議覆奏事竊臣於雍正五年十二月初八日接准  
怡親王戶部尚書臣蔣廷錫來字內開

上諭一道令河南山西山東三省督撫密議會商每省

於步兵內挑選二千人以備明年秋冬調遣其人  
須揀老實壯健不必長於弓馬但可以駕車開墾  
等事之用者若步兵不足即於馬兵內挑選等因  
到臣奉此又於雍正五年十二月二十日接准怡  
親王大學士臣張廷玉戶部尚書臣蔣廷錫來字  
內開前所寄挑選兵丁之信原奉

上諭有不必長於弓馬但能演放鳥鎗并可以駕車之  
用者寫信時少寫能演放鳥鎗字樣茲特再信知

照等因到臣奉此臣遵即先後密行寄字與河南  
汝等三省督撫既經會商即應將意見有無同異處備  
山東督撫會商在案茲臣伏查晉省奉撥之兵擬  
悉書明朕方一目了然

於臣標內挑選二百名太原鎮標內挑選一千名  
大同鎮標內挑選八百名以足二千名之數除弓  
馬不必論其優長外務期能演放鳥鎗并老實壯  
健可以駕車開墾等事之用者方准挑取但為期  
尚早未敢預洩臣惟密札轉囑兩鎮令其密行挑  
選造具花名清冊存案俟欽奉

是

諭旨到日敬謹奉行至於安家銀兩

此處同否緣

謹遵二十箇月

何未下

等字

內外為期之

聖諭每名酌給銀三十兩已比月糧量加盈餘亦俟兵

此一論與田文鏡同

丁臨行時給發但銀兩到手又恐易於花銷俾二

十箇月內家口乏用似應分作四分臨行先給一

分將三分當面封貯公所去後五箇月令其家屬

再領庶行者居者之心均可以相安而不致懸念

矣其各兵行裝衣服等項臣查行裝可以畫一製

備而衣服必須照其身軀分別肥瘦長矮似不便

於官為製給今擬於安家銀兩之外每兵再給銀

此議

亦與田文鏡所奏相同至其數之多寡應否再加

十兩將應用行裝衣服逐件開單一併給發令其

損益汝等更當斟酌

自行製備完畢仍令照單送驗庶易於完備也再

查兵丁各有烏鎗弓箭腰刀等項器械似應令其

隨帶而行以備臨時操演至於盔甲旗幟似可不

必帶往其所需鑼鍋帳房應照營內定制每兵五

名共給各一件每兵五名再買備馱羸二頭鞍架

俱全以員載行裝等物至所挑之兵俱屬步兵似  
可無庸給與馬匹騎坐再查兵丁係各營挑選彙  
集若不委官管領任其散行恐途中不能遵守紀  
律似應照依營中舊制預行酌量派委平日管轄  
之官或遊擊或都守併千把總領旗等數員率領  
前行到彼處地頭或令其交明彼處該管將官使  
各員即回原任或竟令其管轄至二十箇月後掣  
回之時率領各歸營伍其領兵各官之路費銀兩

伏候

諭旨到日臣再查其品職大小路途遠近時日久暫酌

量分別給與緣係欽奉

閱所辦理大同小異處有之但總未聲說明晰  
上諭會同三省督撫諸臣密商事理合將商議辦理情

形先為恭摺密

奏但臣等智識短淺是否合宜伏乞

皇上訓示遵行謹

奏

事同一體不便稍有參差總於豫督田文鏡處畫一行  
之

同日又

奏為欽奉

上諭事雍正五年八月十三日前護理山西撫臣高成  
齡准禮部咨祠祭清吏司案呈禮科鈔出浙江巡  
撫李衛題奏浙江西湖

聖祖行宮一疏奉

旨

聖祖仁皇帝念切民生省方問俗不費地方一絲一粟每

次頒發

諭旨甚明此天下臣民所共知者至於

駐蹕之所地方預備行宮乃出於臣民愛戴之心不能禁  
止亦天下臣工所共知者今行宮既屬閒設每年修  
葺需費防護需人在本地有司未免又多一番經理  
非所以體

聖心而惜物力也李衛所奏甚是即照所請行其餘地方  
有行宮之處如何辦理方為妥協著該督撫會同該  
管官悉心商酌具奏請旨該部知道欽此欽遵鈔出  
到部相應通行直隸各省地方有

行宮之處該督撫會同該管官欽遵

旨內事理悉心酌議具摺請

旨可也等因准此隨經行司欽遵查議去後茲據布政  
司詳稱據代州所屬之五臺縣申稱查得五臺縣

之五臺山於康熙三十一年并五十年曾經

聖祖仁皇帝巡幸

駐蹕晉省官民愛戴建有

行宮三處一在菩薩頂一在射虎川一在羅喉寺今三處  
行宮雖皆空間然俱在各寺之內現有喇嘛朝夕看管似  
無庸另延高僧應否即令本寺喇嘛在內焚修照  
舊看管至三處

行宮現今存貯物件惟黃色團龍椅墊及門簾包袱等物

民間不敢用者解送

內庫外其餘即留為供佛之需等因議詳前來臣覆  
核無異謹繕摺請

旨伏乞

皇上睿鑒施行謹

奏

五臺行宮仍應照舊毋庸另議延僧爾所奏請是

雍正六年二月十八日山西巡撫臣石麟謹

奏為奏

聞事竊臣仰蒙

聖恩畀以撫晉重任凡文武大小官員不時稽察前訪  
聞得太原鎮臣袁立相染有痰疾因其駐劄平陽  
未能覲面近有平陽府知府樊錢倬因公來省臣

細問情形據稱袁立相日常辦事照舊動履亦與  
平時無異惟形容消瘦語言蹇澀不明似乎痰氣  
積滯等語臣查平陽乃緊要重地鎮臣係封疆大

僚臣既聞袁立相染有痰症理合奏

聞謹

奏

袁立相患病情形奏聞甚是近日若何問明再奏以聞尚不至於昏愆猶可令其將就在任若心內不明縱能勉強辦事地方關係緊要豈可因循貽誤耶

雍正六年二月二十八日山西巡撫臣石麟謹

奏為奏

聞事竊照晉省入春以來據各屬申報於二月初三四  
至初十等日各得雪二三寸至六七寸不等十六  
日得微雨近又據各屬報稱二月二十一二兩日  
得雨雪五六寸不等在地麥苗連得滋潤更見青  
葱長發此皆我

皇上愛養民生至誠感格是以雨暘時若普利田疇所  
有得過雨雪情形理合奏

聞謹

奏

各省據報春澤情形山右近隣畿輔正爾懸念今覽此奏朕懷深慰但不可肆志當益加勤慎清理刑名為第一要政念念秉公時時存誠自必常蒙

上蒼垂佑也勉之敬之

雍正六年三月十一日山西巡撫臣石麟謹

奏為奏

聞事竊查臨晉縣姦民師刑樊中花張臣等聚眾鬧縣

已獲之樊中花張臣復越獄脫逃一案經臣將疎  
忽之該縣知縣劉國琮

題叅一面委絳州知州萬國宣與署縣事萬全縣知  
縣杜庭珠懸賞協拏去後今於三月初九日據萬  
國宣等報稱師刑等藏匿不出指使村民彼此固  
結恃險負隅又復聚衆持械拒捕傷死捕役三名  
受傷者數人師刑等仍畏罪藏匿臣查臨晉風俗  
素稱刁頑師刑等今復敢聚衆拒捕傷人實法所

刻不容逭但愚民多係被其煽誘一時難以盡究  
臣隨出示曉諭專拏首惡兇犯復懸賞設法緝拏  
獲犯之日即按律究擬具

題再查臨晉縣止有城守把總一員不足以資彈壓  
臣一面調委蒲州營守備楊名臣帶兵一百名前  
往縣城暫駐彈壓外事關姦民拒捕傷人理合先  
具奏

聞伏乞

皇上睿鑒施行謹

奏

觀此強橫不法光景又一翟斌如之案矣速行嚴拏毋得少有疎忽兵止百名似覺人少力單凡事當防未然不可輕忽常將小事作大事辦方好佈置切須周密勿致再失機宜臨晉地當四達宜預選捕役兵丁派令分路堵截以防其逸脫遠颺此為最要特諭

雍正六年三月二十二日山西巡撫臣石麟謹

奏為奏

聞事竊查臨晉縣姦民師刑樊中花張臣等聚眾拒捕傷人前據絳州知州萬國宣等具報臣隨發示曉諭懸賞緝拏并即委蒲州營守備帶兵前往彈壓當經繕摺奏

聞續准太原鎮臣袁立相咨稱據蒲州副將薛鳳翼具報亦即遣兵三百名前往臨晉相機協拏等因今於三月二十日據署縣杜庭珠申報出示懸賞嚴

拏間蒲州副將薛鳳翼到縣有把總徐雲赴該村  
拏獲首犯師刑到縣收監訖并准太原鎮臣咨會  
首犯師刑已經捉獲投首將前遣兵三百名內撤  
回二百名仍留一百名協同彈壓查拏未獲各犯  
等因各到臣除仍嚴行該州縣等將樊中花張臣  
并拒捕傷人兇犯設法協拏務獲究擬具

題外所有首犯師刑已經拏獲緣由理合先具奏

聞謹

奏

據奏拏獲首犯知道了此等不法刁徒並始初孟浪激成之劣員俱不可絲毫涉於姑息以圖將就結案了事務須徹底根究明白嚴懲示儆

雍正六年四月十八日山西巡撫臣石麟謹  
奏為奏

聞事竊照晉省正二月間連得雨雪麥苗出土青蔥鬱秀經臣具摺奏

聞乃自三月望後以來雨澤稍缺麥苗望雨正殷茲於

四月十五日據平潞二府澤蒲解絳四州報稱四

月初十一日各得雨一二三五寸不等亦未霑

大凡

祈禱先

當省察吏治刑名有無寬猛失宜致干和

氣勤恤民隱返身思過此為最要若徒飾儀文以私心

足

臣現

在率同屬員虔肅修省設壇祈禱并飭各

屬

一體虔敬祈求引望甘霖再地方燥濕失宜自

求

屬完無益也敬之敬之

澤州及平潞至省一帶地方流行疫氣戶多沾染

幸

三四日即愈不致傷人臣隨遍示丹方飭令各

屬建醮祈求已經漸次平安事關地方旱疫理合

屬建醮祈求已經漸次平安事關地方旱疫理合

繕摺奏

聞謹

奏

今歲時氣流行各省俱有沾染病者頗多仰蒙

上天慈佑不數日即愈為可幸耳

同日又

奏為恭繳耗羨

黃冊事竊臣於雍正五年九月二十七日跪請

聖訓之時經陞任撫臣德明於

御前將晉省雍正三年分耗羨奏銷

黃冊一套交臣當即敬謹祇領到任後隨查各年耗羨銀兩多有濫用之項自雍正元年起至五年止逐一清查今已將不應動用及動用內核減之各項款數目并應令賠補之各官職名造冊具

題追補外所有原領

黃冊一套理合恭繳為此謹

奏

凡百處不宜過刻此冊留內無用仍發還與爾收存本省可也

同日又

奏為遵

旨再行奏

聞事竊太原鎮臣袁立相患病緣由經臣具摺奏

聞奉有

硃批臣隨細加訪察俱稱袁立相患病已有半載日常  
辦事心內尚自明白惟語言應對不明因袁立相  
駐劄平陽臣未能覲面前有汾州府知府白映棠  
因公來省問據稟稱鎮臣袁立相前赴汾州看兵  
曾經面會心內明白惟語言蹇澀等語與臣訪聞  
無異理合遵

旨據實奏

聞謹

奏

知道了總兵袁立相實為武臣中之難得者

雍正六年四月二十七日山西巡撫臣石麟謹

奏為奏

聞事竊晉省雨水缺少情由經臣於四月十八日具摺

奏報臣與各屬俱各虔誠修省設壇祈禱今省城太

原府於四月二十一日得雨寸許又據各屬陸續

申報代州應州屯留壺關長治五臺繁峙廣昌垣

曲等州縣均得雨露足其餘各屬亦得雨二三四  
五寸不等尚有未霑足者臣等現在日事祈求所  
有各屬二十一日得雨情形理合奏

聞謹

奏

河南與晉省接壤試觀大法小廉民懷吏畏一切刑名  
錢穀驛站塘汎井井有條河工堤岸修築鞏固直省中  
實為第一整理省分而年來雨暘應時連獲豐收徵驗

亦遂不誣爾能知此朕則更無可諭矣

同日又

奏為請

旨事竊照大同鎮臣祖秉衡親母張氏於本年四月十  
八日在署病故例應丁憂經臣另疏

題報外查大同鎮地處邊疆所轄各營路甚屬緊要  
鎮臣祖秉衡莅任以來實心辦理諸事整飭文武  
和衷兵民悅服皆在

聖明洞鑒之中伏懇

皇上天恩令其在任守制其於邊疆營伍地方均有裨益臣因地方起見不揣冒昧據實陳

奏伏候

聖裁為此謹

奏

不待爾之奏請自必留其在任守制也

雍正六年五月十六日山西巡撫臣石麟謹

奏為欽奉

上諭事雍正六年五月十二日接到怡親王大學士臣張廷玉字開為臨晉縣匪類脫逃一案於雍正六年五月初六日欽奉

上諭一道轉寄到臣臣跪讀之下不勝惶悚伏思臣何人斯乃蒙

聖恩不加罪譴

特賜訓誨天高地厚之恩感激涕零隨傳示按察使蔣

河欽遵外查臨晉縣姦民師刑張臣樊中花等先  
既聚衆鬧縣後復越獄脫逃臣據報之日當即飭  
令出示懸賞嚴拏并將疎縱之知縣劉國琮叅革  
隨委臨晉接壤之萬全縣知縣杜庭珠署理印務  
并委絳州知州萬國宣協同嚴拏而師刑等復敢  
拒捕傷人臣隨咨會太原鎮臣袁立相撥兵彈壓  
查拏當據首犯師刑自首提解省城其張臣樊中  
花藏匿不出又檄諭蒲州營副將薛鳳翼撥兵於

要隘處所堵禦稽查復節次嚴催該州縣選差嚴緝仍將張臣樊中花二犯之家屬嚴行追比又面諭蔣洞差人密訪該二犯潛匿確所并將師刑供出拒捕之樊壽花張舉等一併協拏嗣於四月初六日據署縣杜庭珠以怔忡病發兼染時症難以辦事具詳臣迅飭蒲州知州崔佩速赴該縣督緝務獲又將奉

旨命往山西以州縣補用之閻鈞委其署理臨晉縣印

務淳淳面諭令其設法緝拏兇犯緣彼時杜庭珠  
因病仍回本任而知州崔佩又往猗氏縣盤倉復  
改委閔鈞前往署理以致彌月無官有稽比緝臣  
身任封疆此等姦徒不能即獲究治致稽時日疎  
忽之咎實所難辭況臣才識短淺屢蒙

皇上天恩逾於常格雖粉身碎骨尚不足仰報

高厚於萬一若不實心辦事即為天地之所不容矣至  
鎮臣袁立相以姦民未能就獲慎重地方秉公具

奏臣方感激之不暇何敢少有含怨之心再五月初七日據署縣閔鈔稟稱現在勒比查拏臣又飭令該州縣會同武員將張臣樊中花等迅速協拏務獲即行另

奏外所有微臣欽奉

聖訓感激惶愧之忱謹繕摺奏

謝仰祈

睿鑒謹

奏

於此一事觀爾景況實係心有餘而力不足也若不勤以補拙虛衷博採借人之才為才資人之力為力則恐有覆餗之虞兩司設不稱職尚賴督撫糾正至若督撫之任通省官民休戚相關措施稍涉乖謬餘且勿論雨暘必不協和年歲定多歉薄即如臨晉正值有事之際豈容曠月乏官料理隨又委一試用新員攝署將從前妄行之人並不叅處示懲似此懈弛犯何能獲事何能

集尚有何顏粉飾支吾以奏聞於朕耶朕經諄諄訓爾若不向受福根本處追求亦奚能為勉之慎之為督撫者只一不能用人識人則不克勝封疆之寄矣縱能此二者倘於公勤二字絲毫未盡欲望屬員真心實力代爾任勞任怨亦無有是理試觀田文鏡李衛亦大夫也伊二人無他技術公勤而已今若仍不愧勉則虛負朕恩殊為可惜也

雍正六年五月十八日山西巡撫臣石麟謹

奏為奏

聞事竊照臨晉縣姦民張臣樊中花脫逃未獲一案今於五月十七日據蒲州知州崔佩報稱臨晉縣越獄要犯樊中花於五月十二日據捕役張威鳳等在於接壤之陝西朝邑縣地方拏獲并請護送到州除將該犯暫羈州監飭縣選差幹役領解赴轅聽候審究合將拏獲日期申報等情到臣除飭令將樊中花嚴加押解來省究訊確情并飭將張臣

及拒捕等犯速即緝拏務獲解審外所有獲到樊  
中花緣由先行繕摺奏

聞謹

奏

原係極易為之事總因漫不經心懈怠之故所以稽延  
至今始就獲耳朕實代汝愧之

雍正六年六月初八日山西巡撫臣石麟謹

奏為欽遵

聖訓恭謝

天恩事雍正六年五月二十九日臣齋摺把總回署接  
到

硃批諭旨隨恭設香案望

闕叩頭謝

恩訖伏念臣蒙

皇上簡畀隆恩撫晉以來自愧知識短淺種種不逮乃

荷

聖恩浩蕩不即加罪謹復蒙

鑒臣之心諒臣之力

教臣以知人用人之道

勵臣以惟公惟勤之志此皆

聖主勉臣望臣之深是以屢蒙

訓誨諄諄有加無已臣跪讀之下不禁感愧汗流敬錄

聖訓朝夕虔誦凜如

天威咫尺時加警覺愧勉惟有盡心竭力公勤辦事以

贖前愆仰報我

皇上生成教訓之恩於萬一耳所有微臣感激下悃理  
合恭摺叩謝

天恩謹

奏

覽奏已悉勉之若不能令吏畏民懷如何辦集通省政  
務然民懷之道非徒事姑息也但能察吏民自懷矣吏  
畏之道亦非專用威嚴動輒叅劾也克盡公勤吏自畏

矣惟務本毋逐末奉朕訓諭心悅誠服孜孜實力為之  
好惡不偏勸懲得當斯即公以馭下勤以補拙之謂捨  
此別無良策也勉之慎之

雍正六年七月初八日山西巡撫臣石麟謹

奏為奏

聞事竊照晉省春夏之交雨澤稍欠業經臣繕摺具

奏仰賴

皇上洪福自四月二十一日以後連得雨水四野霑足

茲據各屬陸續報稱二麥收成自五六分至七八  
九分不等現在雨水調勻秋禾俱青蔥茂盛各等  
情前來理合恭摺奏

聞謹

奏

地方上值爾此等巡撫朕之洪福亦何自而來

同日又

奏為奏

聞事竊查臨晉縣鬧縣一案蒙

皇上特命光祿寺正卿臣王璣來晉辦理臣於七月初七日據按察使蔣河具文申稱會同

欽差辦理臨晉縣鬧縣一案多方曉諭宣布

皇仁又復捐給重賞設法招致今扶老攜幼回村復業者千有餘人其鬧縣拒捕各犯除先獲之師刑樊中花王彪外又有張景師張克耀等及實在鬧縣之張臣或自行投首或密行擒獲首從皆無漏網

良善毫無波及閭閻安業地方無事業經移會太  
原鎮將派撥防守兵丁一百名撤回理合報明等  
情到臣臣查此案各犯已經獲到其先獲之師刑  
樊中花等現在俱帶在臨晉除即飭蔣洄將各犯  
質審確情詳報外所有張臣已獲緣由理合奏

聞謹

奏

覽爾所奏洵可謂不知恥矣

雍正六年九月初六日山西巡撫臣石麟謹

奏為奏

聞事雍正六年九月初四日據陽曲縣申稱九月初三日  
夜山西學院衙署失竊卑職隨往驗看出入情  
形係從西房牆扒進挖門入室是竊非強等因又  
准學臣勵宗萬咨明緝拏并失單一紙內開失去  
皮衣蟒錦綉緞等物等情到臣伏查竊盜案件雖  
向無查叅疎防之例但地屬省會又係學臣衙署

失竊與尋常竊案不同臣隨即懸賞飭行按察使  
通飭各屬責差嚴緝并傳太原府廳及陽曲知縣  
面加切責令其協同選差幹捕勒限躡緝務期賊  
賊全獲究擬倘逾限不獲即照盜案例將文武各  
員并疎防職名

題叅以儆疎忽所有學臣衙署失竊緣由合先奏

聞謹

奏

省會地方官衙之內鼠竊敢於肆行無忌則汝平日之法令懈弛槩可知矣若不限日嚴緝務獲以示懲創僅將員弁題叅疎防恐未可以卸汝之責也

同日又

奏為奏

聞事竊臣於雍正六年九月初五日接到怡親王大學士臣張廷玉蔣廷錫字開雍正六年八月二十日奉

上諭據岳鍾琪奏稱欽差顧魯於歸化城採買駝隻必  
由晉省來陝其沿途駐宿料草若委員前往購買支  
給恐事屬隔省不無呼應不靈難免遲誤請敕諭山  
西巡撫石麟移咨顧魯查明進口駝隻確數咨報晉  
省該撫石麟飭令經過地方官預備草料每隻日支  
豆四京升草一束至沿途牽送駝隻人夫併護送官  
弁兵役請令山西撫提轉飭該管文武官弁遴選派  
撥同臣差員一同料理其牽送人夫挨程遞送每駝

四隻需夫一名每夫日給口糧三分此項草豆夫價  
於晉省庫帑動給俟駝隻到陝之日晉撫將動支銀  
兩核實彙冊移咨臣於軍需銀內解晉還項等語爾  
等可寄信與石麟令其照岳鍾琪所奏辦理欽此遵  
旨寄信前來巡撫俟駝隻進口即遵照妥辦并將派撥  
護送兵弁之處密行知會提督袁立相可也等因  
到臣臣欽遵

諭旨將應備料草數目并派撥護送文武官弁兵役隨

檄行布政司及經由各府州縣遵照并即移咨

欽差臣顧魯將駝隻進口確數即行查明咨報又密行  
知會提臣袁立相將護送兵弁派撥外合將遵

旨辦理緣由繕摺奏

聞謹

奏

務須辦理妥協絲毫不得差誤關係軍需要務非諉卸  
屬員可以塞責之事也

雍正六年九月十九日山西巡撫臣石麟謹

奏為恭報

盛世豐年收成分數事竊照晉省地方夏秋雨水調勻  
田禾茂盛先經臣具摺奏

聞茲當萬寶告成之候行據各屬所報收成分數俱有  
十分即鹹鹵沙坡之地亦有八九分收成此皆我  
皇上宵旰不遑重農貴粟事事以民依為念是以感召  
麻和雨暘時若百穀豐登普天率土莫不含哺鼓

腹歌頌於

堯天舜日之下臣與闔屬官民生逢

盛世快覩歲稔時和四民樂業惟有仰遵

聖訓益加恪謹敬承耕藉之典禮以永享昇平之樂利  
而已所有晉省收成分數理合恭摺奏

聞謹

奏

覽奏知道了朕之前旨甚明茲不更諭

同日又

奏為奏

聞事竊照晉省前奉發礮車一百輛並侍衛沙亮袁楚  
楊得元三人前來教導兵丁演習於六月十三日  
到省臣隨將派撥兵數在於省城平陽大同分作  
三處演習今據各侍衛等咸稱教導兵丁演習礮  
車進退旋轉衝馳止守之法俱已齊全各兵已經  
純熟等語除一面仍令再加操練外合將三處兵

丁習學礮車俱皆純熟緣由繕摺奏

聞至各兵丁既經習學純熟似可令各營將弁督率不時操練所有侍衛沙亮等三人應否暫留在晉候旨抑或令其回京臣未敢擅便謹此一并具

奏請

旨謹

奏

兵丁果皆熟諳無庸教導即應令其回京若仍須訓練

則當暫留爾此番請旨處朕殊不解

雍正六年十一月初八日山西巡撫臣石麟謹

奏為遵

旨查奏事雍正五年九月初二日臣面奉

諭旨土默特管旗大人丹進曾奏過土默特處如遇豐  
年米糧價值甚賤若運至晉省甚有裨益但旱路不  
能行走儘可用船隻自黃河運送等語啓奏朕曾交  
與伊都立查議據伊都立奏稱黃河內有幾處水勢

最險不能行走等語朕已批定不行但伊都立為人  
其言難信爾到任後留心細細查問如果行不得則  
止若可行爾再奏聞請旨欽此欽遵臣於到任後每  
遇臨河州縣來省見臣之時逐細查問并諭令各  
員將所管河道里數及某處險峻某處平坦是否  
可以行船逐一查稟內有未甚明晰者復令確查  
茲據各稟覆前來臣查自湖灘河所迤邐而南至  
潼關計程一千八百餘里雖屬順流而山峻水急

諸積橫阻船隻實難涉險即照從前編置木筏裝  
運之議只可為水緩之處而言若於天橋壺口禹  
門等處均必須陸運一二十里或三四十里不等  
危崖仄嶺率皆崎嶇亦屬難行也此係臣集眾稟  
之情形復加確核無異謹將查過情由恭摺奏

聞謹

奏

據奏險阻如是則船隻運送之說實屬不可行矣

雍正六年十二月初四日山西巡撫臣石麟謹

奏為奏

聞事竊查晉省十一月初二日得有瑞雪嗣於二十三  
日省城復得雪二寸餘又據各屬報稱於十一月  
二十三四等日各得雪二三四五寸不等等因到  
臣伏思麥苗初長連得瑞雪滋培更見青蔥茂盛  
此皆我

皇上深仁厚澤教育萬邦是以疊召庥和臣與闔屬官

民惟有額手歡呼共慶昇平之盛所有晉省得雪  
日期理合恭摺奏

聞謹

奏

冬雪不過為來年預兆耳必俟交春後雨澤接續方可  
定其收成敬畏之心絲毫不容稍懈

同日又

奏為敬陳一得之愚仰祈

睿鑒事竊臣至愚極陋荷蒙

天恩畀以晉撫重任一載以來夙夜黽勉惟期有益於  
吏治民生以仰副

皇上勤求治理之至意但臣材識短淺時深隕越之懼  
茲細加查察悉心計慮謹列數事稍申一得之愚  
為我

皇上敬陳之一已經議裁之員即宜酌量調用也一盜  
賊窩家之隣佑十家長宜嚴加治罪也一酗酒行

允宜定以嚴例也一加倍治罪之處尚宜詳定也  
以上四條是否可採伏候

聖明訓示以便具

題為此繕摺請

旨謹

奏

本任內事尚多顧此失彼未能施措合宜何暇及於分  
外天下督撫勝汝者多何待汝初學辦事之庸才增減

律例也

同日又

奏為據實奏

聞仰祈

睿鑒事竊查新補澤州府知府劉毓岳自康熙五十八年補授山西渾源州知州經前撫臣諾岷兩次題請調繁俱蒙

俞允又經臣保

題新設澤州府知府奉

旨照所請補授欽此欽遵在案正在給咨送部引

見奉

旨敕查從前歷年考職監生有代考得官者准其自行  
出首劉毓岳係康熙四十二年由監生考授州同  
職銜彼時實未親身赴考今不敢欺罔遵

旨自首請賜罷斥等情臣另疏具

題外但劉毓岳才幹優長操履廉潔實屬有為有

守之員且澤州新設為府正資辦理而劉毓岳感激  
天恩亦力圖報效今查其當時雖未親身考職但後實  
由捐納選授知州可否

格外從寬免其罷斥出自

聖主洪恩臣謹據實奏

聞伏候

睿鑒施行謹

奏

劉毓岳乃可恕之過也此事當先具摺請旨然後題疏  
今既經具題候題到之日有旨

雍正六年十二月十八日山西巡撫臣石麟謹

奏為奏

聞事竊照晉省地方於雍正六年十一月初二日暨二  
十三日兩次得雪情形經臣具摺奏

聞茲於十二月十三日起至十五日止省城復得雪一  
尺有餘又據各屬報稱各得雪六七八寸不等等

因前來臣思麥苗在地連得瑞雪滋培今復得雪  
一尺有餘則土脈肥潤將見麥隴青蔥更加茂盛  
矣所有得雪盈尺緣由恭摺奏

聞謹

奏

覽晉省得雪情形朕懷深慰

雍正七年正月初四日山西巡撫臣石麟謹  
奏為

聖朝德化廣孚士民還金疊見據實奏

聞事竊臣於雍正六年十二月十九日據汾州府孝義縣詳稱雍正六年十二月十二日據介休縣民張福烈具稟詞稱烈係雜貨生理於十月十一日路經孝邑地方遺失小稍囊一箇內有銀二十三兩四錢銅錢三百四十文行至北窰村外知覺隨即回身沿途尋查至十里舖地方見一人拉馬站彼烈隨向問彼即問烈所失之銀錢數目相符即行

給還當時願謝固辭不受問其姓名不答而去細  
訪至今始知是孝邑南窰村生員梁璣烈實感激  
難安登門酬謝堅辭不受驚聞隣里似此善人不  
可多得特此報明等情詳報到臣又於十二月二  
十日據蒲州府永濟縣詳稱本邑小李村民崔效  
林務農力作雍正六年十月十四日於任家莊東  
首道上拾得布包一箇內係金珠首飾即於次早  
默坐於任良田店門首守候及失物之人奔至尋

覓效林細問件數式樣俱符隨將原物交還十九日失物人高世津送食物四盒銀四兩來謝效林堅不肯受隣佑鄉約公報到縣具詳到臣竊查拾金不昧自古云難今生員梁璣見利思義毫不苟取且不道姓名不受酬謝無忝士林至崔效林乃一介鄉民路拾金珠悉還失主堅辭酬謝靡有望報之念尤為閭閻難得之美行此皆我

皇上化神德盛致士民革薄從忠咸相摩以義是以秉

懿之好觀感而興起者遂頻聞而疊見也除一面  
給發花紅匾額行令各該縣嘉獎外事闡風化臣  
不敢壅於上

聞謹

奏

該部議奏

雍正七年二月初八日山西巡撫臣石麟謹

奏為請

旨事竊照晉省前奉發礮車一百輛并侍衛沙亮等前  
來教導兵丁演習迨後兵丁習學純熟經臣奏

聞在案茲准大同鎮臣張善札稱前在陝省所演礮車  
上有小旗一桿虎頭遮牌一面下有遮擋一條今  
所演之車上少此三件殊覺未齊恐一有行走臨  
時製造難免愴惶應行添製并齎旗牌等式樣到  
臣其遮牌係用單張牛皮上畫虎頭遮擋係用氈  
裏布面復准提臣袁立相札稱接大同鎮之札車

上少此三件似應共為製備等語臣查奉發之車  
原無此小旗遮牌遮擋等項似屬備用之物今應  
否即為添製臣未敢擅便謹繕摺奏

聞伏祈

睿鑒訓示遵行謹

奏

旗牌等三件京中所造車輛皆有因操演之時非比臨  
陣可以不用所以未經發來不必再為添製

同日又

奏為欽奉

上諭事雍正六年八月十二日准戶部咨開雍正六年七月二十六日內閣交出奉

上諭前因山東叅革知縣朱成元令家人叩閣一案朕命學士繆沅前往審理據繆沅將朱成元蒲臺縣任內餽送巡撫布按各官規禮印簿查出陳奏朕一一閱看知係朱成元任內二十餘年餽送上司之陋規

而雍正元年以後仍復餽送如故已交部嚴察議奏  
自朕即位以來嚴飭官方禁止私賄又恐督撫等官  
用度不敷暗中巧取是以給與養廉之項俾其公私  
有賴俯仰從容庶可永杜苞苴以為澄清吏治之本  
蓋上司既受屬員之餽遺又何以禁止屬員之貪墨  
甚至以餽遺之多寡分情誼之厚薄則屬員之優劣  
何由辨別而吏治尚可問乎故不能禁止餽遺必不  
能秉公察吏不能秉公察吏必不能有益於政治民

生此相因之勢一定之理也各省督撫養廉之項皆經奏聞奉旨者司道等官亦皆於公用內支給其無公項可支之員亦應於督撫前陳明准其收受何項以為用度焉有朝廷既給養廉而仍收屬員陋規之理今觀山東巡撫司道等官之私收陋規如故則他省或有似此欺隱私受者亦未可知著各省督撫一嚴查據實陳奏在地方官薪水之資自不可缺但於屬員之手接受節禮陋規斷乎不可目今各省內

或有尚未分給養廉之員著各督撫悉心商酌一面  
辦理一面奏聞寧可以州縣應出之項解至藩庫從  
公發給而不可使其自相授受廢公義而徇私交留  
禮儀交際之名而長貪婪賄賂之弊也倘再有私收  
規禮將該員置之重典其該管之督撫亦從重治罪  
欽此等因轉行到臣臣欽遵

上諭隨細加嚴查并通飭各司道府廳州縣將自雍正  
元年以後有無餽送上司陋規并有無收受屬員

規禮各據實開報不得隱飾瞻徇去後隨據吉州  
蒲縣知縣蕭藻開報該州知州李璵之母生辰曾  
餽送盃緞等項壽禮李璵收受等情臣當於互揭  
案内

題叅在案其餘除陞遷他省事故回籍者無憑查察  
現任晉省者俱覆稱並無餽送上司陋規及收受  
屬員規禮各出具不敢隱捏印結前來又據按察  
使蔣洞詳稱遵查洞自雍正三年四月十二日抵

山西臬司之任迄今並無收受屬員節禮陋規亦無餽送上司規禮之處但查雍正三年前院伊都立四十正壽曾公送過壽屏盃幣一次雍正四年伊都立之母六十正壽亦曾送過壽屏盃幣一次俱係原任布政司高成齡備辦洵及糧驛道胡瀛雁平道謝王寵河東道潘宏裔列名公送此係因正壽致祝並非餽送規禮今蒙行查據實詳覆等因到臣查晉省各員雖據覆稱並無餽送陋規

及收受規禮具結在案臣仍時加嚴查嗣後一有發覺違犯即行參究不敢容隱再查晉省自巡撫以至州縣皆蒙

聖恩於雍正元年起議定賞給養廉並無未給養廉之員臣謹據實陳

奏伏候

睿鑒謹

奏

覽奏知道了據開壽屏等項不過些少酬酢儀文偶然之舉乃人情物理中事非年規節禮可比也

雍正七年二月二十九日山西巡撫臣石麟謹

奏為欽奉

上諭事雍正七年二月二十九日准吏部咨開雍正七年二月二十三日奉

上諭聞二月初五日夜山西蒲州城內道府城守文武衙門三處同日被盜明火執杖劫去衣物等項此事

朕已聞知而巡撫提督兩司何以遲延尚未奏聞山西地方盜竊之事甚多今以地方大員衙署尚且被劫則民間可知矣巡撫提督等所司何事而疎縱廢弛至於如此著巡撫提督等轉飭屬員將蒲州盜犯嚴行緝捕務令全獲倘少有隱飾逾限不獲定將巡撫提督等一併嚴加議處欽此等因到臣臣跪讀之下不禁悚惶戰慄之至竊臣仰蒙

皇上天恩畀以封疆重任不能緝盜安民竟至衙署被

賊接續頻聞是臣既不能消弭於未然何敢復隱飾於事後但前據各屬報稱俱係竊賊續據霍州報稱協同蒲州府永濟縣差人拏獲李添才等成羣結隊騎馬乘騾假扮客商贓物纍纍等情到臣臣查此案夥賊情形似非鼠竊之流或地方官從前諱強為竊亦未可定隨飛飭蒲州府永濟縣嚴審強竊實情夥盜確數姓名行劫過處所并查此外有無隱諱之處務期全獲以靖地方俟詳報到

日方行具

奏以致有稽時日茲欽奉

上諭訓飭臣實無地自容遲延疎忽之咎實所難辭伏  
懇

聖主格外恩宥臣惟有匍匍竭力辦理以贖前愆謹此  
繕摺奏

聞謹

奏

朕日前諭旨係由部頒發應汝等會疏題覆之事何乃具摺奏聞耶

雍正七年三月十一日山西巡撫臣石麟謹

奏為奏

聞事竊照晉省地畝半屬山岡土坡全資雨水及時且值春和正麥苗長發之際更藉滋培自入春以來雨水調勻土地滋潤茲據各屬報稱三月初一日又得雨雪三四寸至六七寸不等高原下隰靡不

霑足萬姓歡騰此皆我

皇上重農貴粟無刻不以民依為念是以感召麻和雨  
暘時若麥隴青蔥臣惟有益加謹勉共樂昇平而  
已所有春間得過雨雪并麥秀緣由恭摺奏

聞謹

奏

惟宜一秉公忠倍加誠敬以迓

上天之錫佑切毋少涉高興恣肆時自省察可也

雍正七年三月二十九日山西巡撫臣石麟謹  
奏為奏

聞事竊照晉省春間得過雨雪日期經臣繕摺具

奏茲據各屬報稱三月初十一暨二十一二十二等日  
連得時雨四野霑足麥隴青蔥高粱雜粟俱各長  
發秋禾亦乘時播種野老農夫咸稱我

皇上勤求上治時切民依故得此時雨普被百穀秀發  
等因到臣臣惟有益加誠敬公忠凜遵

聖訓修身克己共慶昇平樂利而已所有連得時雨緣

由恭摺奏

聞謹

奏

覽得雨情形深慰朕懷果能誠敬持躬時刻勿懈自蒙

上蒼降鑒也

雍正七年四月二十七日山西巡撫臣石麟謹

奏為請

旨事竊照晉省州縣於雍正二年間經前撫臣諾岷以太原平陽二府地方遼濶知府一官不能周歷稽查

題請分設直隸州將附近之縣歸於州轄就近稽查  
經部臣議覆奉

旨俞允遵行在案今臣查閱輿圖訪諸衆論所設直隸各州分隸管轄妥協者固多其中間有數處道里遠近不同形勢亦非聯絡者臣既查明不敢以已

定之制而遂苟且隱默也如分隸解州之垣曲縣

距州治三百六十里相隔崇山峻嶺公文往來遶

道傳遞呼應不靈惟與絳州相距一百九十里似

應歸於絳州管轄又如平陽府屬之間喜縣距府

二百一十里絳縣距府一百八十里道里雖非甚

遠但中間為絳州所屬之太平襄陽二縣地方隔

斷形勢迥異查聞喜縣距絳州僅七十里絳縣距

絳州僅一百里且界址相連此二縣似應歸於絳

州管轄至絳州所屬之太平縣距平陽府僅九十里襄陵縣距平陽府僅三十里此二縣似應歸於平陽府管轄如此一轉移間則府州與所屬之縣俱各方隅聯絡道里適均凡稽查倉庫錢糧審解詞訟案件更為便易而於吏治民生均有裨益矣  
臣為地方起見謹抒末議是否可行伏乞

聖明訓示以便具

題為此繕摺請

旨謹

奏

據奏以垣曲等三縣歸於絳州管轄太平等二縣歸於平陽府管轄似屬有理但汝之識見朕信不及如何批諭是否

同日又

奏為奏

聞事竊照晉省車騎兵丁二千名接准部咨調取定於

五月二十五日以前到京并令各帶綿甲前往等  
因臣隨移行提鎮并各營一體遵照但查撫標二  
營提標各營止有鐵盔甲向無綿甲綿壯帽大同  
鎮標三營有綿甲七百九十副而無綿壯帽臣准  
提鎮二臣咨會製造隨於司庫耗羨公項銀兩動  
支分給各照調用車兵之數製造綿甲綿壯帽今  
已一色完備至兵丁每名蒙

皇恩賞給銀二十兩又准給製辦行裝銀六兩并令僱

給騾匹馱載行裝至京臣准部咨俱即動銀給發并僱就騾匹分給其領兵官員至京路費先准部咨令於公項銀內量行給發臣酌議叅將給銀三十兩守備二十兩千把總十五兩動銀給領又欽奉

諭旨總兵副將叅遊守備等員各賞二年俸銀千把等員各賞給二年俸薪銀兩即動用藩庫銀兩賞給欽此欽遵隨即動銀按數給領至兵丁及官員跟役

進京一路口糧接准部咨令於公項銀內一體量  
給亦經查照動給俱一一辦理妥當隨准提臣袁  
立相咨會提標各營車兵一千名撫標車兵二百  
名酌分三起赴京定於四月二十二十一五月初  
二等日按次起行大同鎮標各營車兵八百名准  
鎮臣張善咨會分作三起赴京定於五月初六初  
七初八等日起行除領兵各官職名并動用過各  
銀兩數目現在核實造冊分別

題咨送部查銷外合將晉省辦理軍務及官兵分起  
起行日期臣謹恭摺奏

聞謹

奏

軍需事務前經諭爾與田文鏡處畫一而行第當遵旨  
照依豫省辦理已耳何須瑣瑣煩瀆且又不聲說曾與  
田文鏡商明異同與否朕殊不解汝意何居

雍正七年五月初六日山西巡撫臣石麟謹

奏為奏

聞事竊照晉省自入夏以來雖得微雨未獲普足茲於  
四月二十七日申時起至二十八日寅時止省城  
得雨三寸餘據各屬陸續報稱亦是日夜各得  
雨二三四五六寸不等四野均霑又於五月初四  
初五兩日省城得雨四寸夫麥苗當此吐花秀發  
之候連得膏雨普被田疇萬姓歡騰咸頌我

皇上念切民依感召麻和之所致也所有連得時雨情

由理合恭摺奏

聞謹

奏

覽奏實慰朕懷更宜加勉感召

天和之道毋容稍怠雖據奏稱萬姓歡騰直待秋成後朕方敢釋懷也

雍正七年七月初八日山西巡撫臣石麟謹  
奏為奏

聞事竊照晉省各屬二麥收成分數臣正檄飭各屬確查申報間於雍正七年六月二十三日接大學士公馬爾賽等字開欽奉

上諭向來各省督撫奏報年歲收成皆云幾分至幾分不等似此未曾分晰清楚未免朦混嗣後可細加分別一府之中如九分者居十之幾八分者居十之幾照此類推據實奏報則朕可以詳悉收成之分數爾等可寄信與各督撫知之欽此欽遵仰見我

皇上重農貴粟誠求民依之至意茲據各府州將該屬  
二麥收成分數分別申報前來自六分起至十分  
不等臣欽遵

諭旨細加查核各府州所轄之州縣多寡不同今按其  
各屬所報分數據實另繕清摺恭呈

御覽外理合奏

聞謹

奏

覽所開收成分數單內澤州聞得雨甚屬調勻何乃收成不及他州縣代州於五月初間少覺缺雨何以收成分數更勝別屬大約總據該府州任意開報即行鈔錄奏聞並未留心一加訪問也

同日又

奏為奏

聞事雍正七年六月十八日接怡親王大學士公馬爾賽等字開山西巡撫即密行緝訪將其人解送來

京不過質問明白便行釋放之人不可拘禁然亦  
不可疎縱此係奉

旨事理巡撫務須秘密或其人出遊於外將現往何處  
查訪得實即飛信相聞又單開党琮河東人曾作  
鄂林忒幕賓後在西寧住候選守備在允禩軍中  
效力官員內行走過曾隨允禩入京等因臣隨密  
差標員飛往河東地方緝訪於六月二十八日在  
平陽府臨汾縣城外東關緝獲党琮七月初五日

解至省城臣隨面詢據其所供與來單所開無異  
二 臣即差把總二員帶領兵丁六名一路小心護解  
於七月初六日自山西省城起解赴京外理合繕  
摺奏

聞謹

奏

未經逾時其人即已緝獲殊屬可嘉

雍正七年九月二十日山西巡撫臣石麟謹

奏為恭報

盛世豐年收成分數事竊照晉省地方今歲雨水甚屬  
調勻田禾俱各茂盛茲當百穀咸登之候行據各  
屬開報收成分數東西南北高原下隰無不豐收  
而陽曲縣清源縣鳳臺縣俱十分有餘收成至山  
僻州縣鹹鹵沙坡之地亦有七八九分收成不等  
其霍州五臺縣藉田民田之內產有三穗四穗五  
穗及尺餘之嘉禾各等情到臣臣逐一留心細加

查訪俱確實無異白叟黃童咸歌

帝德臣與闔屬官民欣逢

盛世快觀豐盈惟有仰遵

聖訓益加恪謹敬承耕藉之典禮并復勸諭百姓崇節  
儉裕積蓄以永享昇平之樂利於無已耳臣謹按  
各屬所報分數欽遵

諭旨分別開明據實另繕清摺恭呈

御覽外理合奏

聞謹

奏

覽奏實慰朕懷此皆汝地方大吏克盡公誠方能上感  
天和致茲豐稔當愈加敬畏勤慎從事絲毫毋得肆志

雍正七年十一月初七日山西巡撫臣石麟謹

奏為恭謝

天恩事雍正七年十一月初三日齋摺把總回晉恭捧

到

皇上賞賜哈密瓜一箇臣隨跪迎至署恭設香案望闕叩頭謝

恩祇領訖伏念臣一介庸愚荷蒙

聖恩畀以撫晉重任寸長未效乃蒙

殊恩異數疊沛頻施有加無已臣感激難名愈深惶悚  
惟有朝夕黽勉殫竭駑駘以冀仰報

高厚於萬一耳理合繕摺恭謝

天恩謹

奏

覽奏謝知道了

操守為居官之根本本立則道自生

上天之所棄取惟在於公私而已然公私二字須要辨明  
乃心國家即為公乃心利己即為私如為身家禍福計  
心一涉私縱行善事亦恐不能仰邀

上天之眷佑何況非善乎苟不貪利沽名復不作威作福  
一派公忠致身於國將見無為不遂無往不昌也試行

看鄂爾泰田文鏡等無他奇異技術不過於根本上見得透立得定耳可不勉哉將此諭亦令蔣洵知之

同日又

奏為

皇恩愛民深切民情效力急公恭摺奏

聞事竊臣於雍正七年九月十一日接准部咨令晉省製造駝屨繩氊等項三萬副務於十一月內辦齊派官運送於次年正月二十日以前送至二十一

臺處交收其辦屨及脚價俱作正開銷並奉

旨敕臣將需用錢糧據實造報作正開銷毋令承辦官  
員分毫賠累倘有限於部定之價不敷採辦者於存  
公銀內動支銷算務將屨繩等項皆極堅固緊厚依  
限解送欽此欽遵臣即酌議行令通省州縣分辦庶  
易為力而速於齊全一面即動司庫銀兩給發採  
買毛麻上緊製造不許絲毫派累里民務期堅固  
緊厚其自本地運至歸化城之脚價據布政使蔣

河亦動司庫銀兩預行給發至由歸化城解送二  
十一臺已遴委河東道潘宏裔為總領委平陽潞  
安汾州寧武等府四同知為分運先行齎銀赴歸  
化城僱覓車駝以便依限解送各在案茲各州縣  
俱竭力製造繩屨已漸次造完現在陸續報解間  
據太平潞汾大朔寧蒲澤九府遼沁平忻代保解  
絳吉隰十州等詳稱據各紳衿士民人等呈稱伊  
等生逢

聖世屢荷

皇恩浩蕩難名備辦軍需毫無差累今聞繩屨告竣值  
此農隙之際情願自備車輛騾隻各從本地運至  
歸化城交收稍申報效之忱等情紛紛詳報到臣  
又有衆士民赴臣衙門具呈籲請者臣伏思

皇上愛養元元有加無已晉省連歲豐收尚蒙

特恩免賦則此運送繩屨於歸化城脚價已經動給且  
關緊急軍需自應仍令地方官給價雇送無須士

民領運是以宣布

皇仁再三慰止所有輿情感戴歡躍之忱臣不敢壅於  
上

聞謹

奏

據奏民情踴躍報效朕嘉悅覽之此皆汝等大員平日  
化導有方臨事辦理得法始有感激輸誠之效悉能如  
是汝等身居其地顏面豈不增色乎可見果能公誠未

有不感動之事睹此當愈加畏慎毋少肆志否則前功盡棄恐倍獲罪於

天也勉之勉之總之絲毫不可涉於高興但一秉至公不計前程利鈍徑直行去試看何如此諭亦與蔣洞看

同日又

奏為奏

聞事竊照晉省於九月二十二日戌時下雪起至二十三日卯時止得雪一寸有餘又於十月初六日得

雪寸餘臣隨行據各府州陸續報稱所屬地方於  
九月二十二三兩日各得雪二三四五寸不等又  
於十月初五六兩日各得雪二三四寸不等查麥  
苗在地欣逢瑞雪滋培大有裨益萬姓歡呼咸稱  
嘉瑞所有晉省得雪日期理合恭摺奏

聞謹

奏

山陝地方冬雪甚為緊要據奏該省得雪分寸尚覺不

足竭誠祈禱可也近京於十月十一日得盈尺之雪後  
又連得一兩寸之雪數次但地方不廣自保定以南即  
不過二寸許耳

同日又

奏為請

旨事竊照晉省蒙

皇上特諭蠲免庚戌年地丁銀四十萬兩

臣接准部咨

敬奉

上諭通行宣布隨據通省紳士軍民人等歡欣感戴呈  
請代

題恭謝

天恩在案惟查大同朔平二府原額地畝銀錢內有因  
右衛駐防官兵於康熙三十三年及四十九年議  
將額徵銀錢改徵米豆草束支放官兵至康熙五  
十一年欽奉

恩旨蠲免本年錢糧并歷年舊欠前項本色糧草經前撫

臣蘇克濟及左都御史臣趙申喬先後

題請一例免徵部議欽奉

上諭內並無蠲免米豆草束將所題俱毋庸議等因奉  
聖祖仁皇帝特旨准予蠲免欽遵在案今前項米豆草束

內於雍正元二年又

題定將旗兵留支餵養馬匹之豆草折價支給於是  
大同府屬原改徵本色豆草今仍舊折徵銀三萬  
八千二十七兩零外尚存改徵本色米三萬一千

七百二十三石零計合原額銀三萬六千四百八

十一兩零尚存本色豆八千四百三十八石零計

合原額銀八千一百八十五兩零朔平府屬原改

徵本色豆草今仍舊折徵銀一萬七百七十四兩

零外尚存改徵本色米七千六百八十六石零計

合原額銀八千八百三十九兩零尚存改徵本色

豆二千四百二十石零計合原額銀二千三百四

十八兩零以上大朔二府復徵改徵二項計通共

銀一十萬四千六百五十四兩零但查此改徵本色并復徵折色原均係額徵地畝銀兩今似應一體邀

恩并入應蠲四十萬兩數內與通省地丁核算約共合每兩應蠲免銀一錢三分三釐零而駐防旗兵應支糧餉除蠲免外不敷之米有原任同知鄂齊理賠補之米可以撥抵其豆原有長餘仍足敷支放之數俾邊方羣黎無一夫不均沾

聖澤闔省編氓無一處不感沐

皇仁矣為此具摺恭請

聖訓如蒙

俞允臣另繕疏具

題謹

奏

自應如是辦理亦不必另行繕疏請旨照此辦理完竣  
後將緣由題明可也

雍正七年十一月十七日山西巡撫臣石麟謹

奏為民情效力踴躍再三慰諭不止恭摺奏

聞事竊照晉省各屬士民情願將奉

旨動用正項錢糧製造之駱駝繩屨三萬副各從本地  
自備車驟運送至歸化城交收踴躍報效等情經  
臣據詳一面恭摺奏

聞一面令各屬宣布

皇仁再三慰止去後數日以來復據各屬報稱遵即轉

諭乃各士民咸稱

聖主宵旰勤民

至誠昭格連登豐稔復蒙

恩膏減免錢糧

朝廷愛民直如赤子安享昇平無以為報此項運送繩

屨必效犬馬之勞各州縣將脚價雇覓車騾而士

民或挽車而來或拉騾而至擊鼓駢肩一時雲集

爭先背負裝載恐遲各州縣即將所發脚價照數

散給而士民皆感激涕零不肯領取各州縣止之不能強之不可只得差丁役同其起程運送等情紛紛申報到臣似此民情急公效力既肫且切實為曠古之所稀聞此皆

聖德

皇恩之及於民者淪肌浹髓以致士民之踴躍辦公爭先報效者俱出一片忠誠之心實欲止之而不能也臣目覩輿情惟深欣慶除現繕疏具

題外謹再恭摺奏

聞謹

奏

覽奏深為嘉悅具題到日有旨

新補大同總兵徐起鳳前於叅將任內來京引見時朕  
未經著意看驗昨據田文鏡舉為一等且因其歷俸已  
深所以擢用今職及伊面請訓旨審觀其人聽其奏對  
甚覺庸愚恐不勝此要任爾其留心察訪的確據實秉

公密奏以聞

硃批諭旨卷二百十七之二



總校官庶吉士臣侍朝

校對官編修臣莫瞻菴

謄錄監生臣周元璿